



Vrijednost donošenja salavata na Poslanika, sallallahu alejhi ve sellem (Meka)

Hatib: dr. Mahir ibn Hamed el-Muajkili

2. redžeb 1443. po Hidžri / 4. februar 2022.

Hvala Allahu Koji se u odnosu na sva Svoja stvorenja izdvaja lijepim imenima i savršenim svojstvima, Koji sve obuhvata Svojim znanjem i milošću i Koji nas je obdario mnogobrojnim blagodatima, dobrotama i darovima. Hvalim Ga onoliko koliko je Njegovih stvorenja, koliko je On zadovoljan, koliki je Njegov Arš i koliko je Njegovih riječi. Svjedočim da nema boga osim Allaha, jedinog, Koji nema druga, i svjedočim da je naš prvak i vjerovjesnik Muhammed, sallallahu alejhi ve sellem, Njegov rob i poslanik, najugledniji i najpoštovaniji od svih ljudi, kojeg je Allah poslao da otvori slijepu oči, gluhe uši i omekša otvrdla srca, neka su na njega Allahov spas, blagoslov i mir, i na njegovu porodicu, ashabe i supruge, najbolje, najbogobožnije i najpobožnije pripadnike ovog ummeta, i na tabiine i sve oni koji ih slijede u dobročinstvu do Sudnjeg dana. O muslimani, oporučujem sebi i vama bogobožnost, ona je istinska poputnina za Dan povratka Allahu i opskrba za Dan dozivanja. Pametan i razborit je onaj koji obračunava svoju dušu i radi za ono što dolazi poslije smrti, a nemoćan je i slab onaj koji udovoljava prohtjevima duše i neosnovano se nada dobru od Allaha. "O ljudi, bojte se Gospodara svoga i strahujte od Dana kod roditelj djetetu svome neće moći nimalo pomoći, niti će dijete moći svome roditelju imalo pomoći! Allahova prijetnja je istinita, pa neka vas nikako život na ovome svijetu ne zavara i neka vas u Allaha šejtan ne pokoleba." (Lukman, 33) Ummete islama! Allah je poslao našeg vjerovjesnika Muhammeda, sallallahu alejhi ve sellem, kao milost svjetovima i spas bogobožnima koji budu čvrsto vjerovali u njega. On je Allahov rob i poslanik, odabranik, miljenik, povjerenik Njegove objave, najbolji od Njegovih stvorenja, milostivi i plemeniti vjerovjesnik, onaj kome pripada mekami-mahmud – uzvišeno mjesto, mjesto hvale vrijedno i Havd. Allah je uzvisio





njegov položaj, učinio prostranim njegova prsa, skinuo sa njega teret, uzdigao spomen na njega. Njemu pripadaju ogromne zasluge kod njegovog ummeta. Njime nas je Allah uputio na Pravi put i spasio od patnje u Ognju. “Došao vam je Poslanik, jedan od vas, teško mu je što ćete na muke udariti, jedva čeka da Pravim putem pođete, a prema vjernicima je blag i milostiv.” (Et-Tevba, 128) Zbog njegove odabranosti i visokog stepena, Allah, džellešānuhu, privilegovao ga je salavatom – posebnim blagoslovom u odnosu na ostale vjerovjesnike i poslanike. Uzvišeni Gospodar, Snažni i Silni, Veliki i Mudri, Čija su imena sveta, u Svojoj uzvišenosti i svetosti blagosilja plemenitog vjerovjesnika: “Allah i meleki Njegovi blagosiljaju Vjerovjesnika.

O vjernici, blagosiljajte ga i vi i šalžite mu pozdrav!” (El-Ahzab, 56) Allahovo blagosiljanje – salavat Njegovog vjerovjesnika znači: hvaljenje, iskazivanje poštovanja, spominjanje njegovih vrлина, ukazivanje na Njegovu ljubav prema njemu i visoko mjesto koje uživa kod Njega, a blagosiljanje meleka i drugih znači traženje od Allaha tih privilegija za njega.

U Buharijevom Sahihu bilježi se od Ebu Alije, Allah mu se smilovao, da je rekao: “Allahovo blagosiljanje je hvaljenje Poslanika, sallallahu alejhi ve sellem, pred melekima, a blagosiljanje meleka je dova.”

Blagosiljanje Poslanika (donošenje salavata na njega), sallallahu alejhi ve sellem, veličanstven je ibadet i pobožno djelo, koje je Allah, džellešānuhu, prvo pripisao Sebi, a potom Svojim melekima, i koje je naredio Svojim robovima vjernicima. Iz ljubavi prema Svome Poslaniku, Allah, džellešānuhu, učinio je pokornost njemu neodvojivom od pokornosti Njemu Uzvišenom. Ljubav prema Njemu vezao je za njegovo slijeđenje, a njegovo spominjanje za Svoje spominjanje, nikada se ne spomene Allah a da se uz Njega ne spomene i Njegov Poslanik, sallallahu alejhi ve sellem.

U komentaru ajeta: “A života Mi tvoga, oni su u pijanstvu svome lutali” (El-Hidžr, 72), Ibn Abbas, radijallahu anhu, rekao je: “Allah nije stvorio plemenitije biće, kod Sebe, od Muhammeda, sallallahu alejhi ve sellem, i nije se zakleo ničijim životom





osim njegovim.” Blagosiljanje Poslanika, sallallahu alejhi ve sellem, predstavlja ispunjenje nekih njegovih prava, podsjećanje na obavezu ljubavi prema njemu, slijeđenje njegovog šerijata (vjerozakona), uvećanje dobrih djela, iskup za grijeha i podizanje stepena kod Allaha.

Ibn Kajjim, Allah mu se smilovao, rekao je: “Blagosiljanje Poslanika, sallallahu alejhi ve sellem, najmanje je što čovjek može učiniti u pogledu njegovih prava i zahvalnost je na blagodati njegovog poslanstva, kojim nas je Allah počastio. Ono što on zaista zaslužuje ne može se obuhvatiti spoznajom, sposobnošću niti namjerom, ali Uzvišeni Allah, iz Svoje plemenitosti, prihvata od Svojih robova i najmanji vid zahvalnosti i ispunjenja njegovih prava.”

Poštovani vjernici! Donošenje mnoštva salavata na Vjerovjesnika, sallallahu alejhi ve sellem, dokaz je ljubavi prema njemu, a uz to je i stalno podsjećanje na njegovu vrijednost, vjerovanje u istinu s kojom je došao, postupanje u skladu s njegovim sunnetom i ostavljanje onoga što je on zabranio. Onaj ko nešto voli, on to stalno spominje i uporno ga hvali. Ko donese salavat i selam na Vjerovjesnika, sallallahu alejhi ve sellem, Allah će ga nagraditi onom vrstom nagrade od koje je njegovo djelo, i nadoknadit će mu to deseterostrukim salavatom i selamom od Sebe, a sretan je onaj koga njegov Gospodar pohvali.

Nesai bilježi od Abdullaha ibn Ebu Talhe, a on od svoga oca, radijallahu anhu, da je Allahov Poslanik, sallallahu alejhi ve sellem, došao jednog dana radosnog lica, pa smo mu rekli: “Vidimo radost na tvom licu”, a on reče: “Došao mi je melek Džibril, alejhis-selam, i rekao: ‘O Muhammede, tvoj Gospodar rekao je: ‘Zar ne bi bio zadovoljan time da niko ne donese salavat na tebe a da Ja na njega ne donesem deset salavata, i da te niko ne pozdravi jednom a da Ja njega ne pozdravim deset puta?’” Dakle, Allah, džellešanu, uvećao je nagradu za blagosiljanje Poslanika, sallallahu alejhi ve sellem, i onima koji donose salavat na njega ukazao je počast i na dunjaluku i na ahiretu. Ko želi da se Poslanik, sallallahu alejhi ve sellem, zauzima za njega na Sudnjem danu, neka često donosi salavate na njega. Najpreči i najbliži Vjerovjesniku na Sudnjem danu bit će oni koji su najviše donosili salavat na njega na dunjaluku.





Muslim bilježi da je Poslanik, sallallahu alejhi ve sellem, rekao: “Kada čujete mujezina, ponavljajte za njim, a zatim donesite salavat na mene. Ko na mene donese jedan salavat, Allah na njega donese deset salavata. Nakon toga molite Allaha da mi podari El-Vesilu, a to je stepen u Džennetu koji priliči samo jednom Allahovom robu, nadam se da ću ja biti taj rob. Ko bude za mene tražio El-Vesilu, dopušten mu je moj šefat – zauzimanje.”

Poslanik, sallallahu alejhi ve sellem, zauzimat će se za sedamdeset hiljada ljudi iz njegovog ummeta, i oni će ući u Džennet bez polaganja računa i bez kazne. Zauzimat će se i za one koji su ušli u Džennet, da im se poveća deredža, i za grešnike koji su zaslužili Džehennem, pa će ih Allah spasiti od njega, i za one koji su obožavali samo jednog Boga, ali su ušli u Džehennem zbog grijeha, pa će oni izaći iz Džehennema zbog njegovog šefata.

O vjernici, blagosiljanje Vjerovjesnika, sallallahu alejhi ve sellem, spada u adabe – pohvalne radnje prilikom dove. Krajnje što čovjek traži u svojim dovama jeste otklanjanje briga i tuge, i postizanje sreće i dobra. Koliko samo tuga i briga stvaraju tjeskobe u grudima i pomućuju sreću i radost! S njima čovjek ne može uživati ni u snu, ni u jelu ni u piću. Njihovi sati su dani, a njihovi dani su mjeseci. Ne odvajaju se od bolesnika u krevetu, bogataša u dvorcu, siromaha u nevolji.

Donošenje salavata na Poslanika, sallallahu alejhi ve sellem, oslobađa čovjeka od njegovih briga i iskupljuje ga od grijeha. Ko se spasi brige, sačuvao se od dunjalučkih iskušenja, a kome budu oprosteni grijesi, sačuvao se ahiretskih iskušenja, nevolja i strahota.

Ubejj ibn Ka’b, radijallahu anhu, imao je posebno vrijeme u kojem se osamljivao sa svojim Gospodarom, i molio Ga da ispuni njegove potrebe. Jednom je rekao Poslaniku, sallallahu alejhi ve sellem: “Allahov Poslaniče, ja često donosim salavate na tebe, pa koliko ću svoje dove posvetiti salavatima?” Poslanik, sallallahu alejhi ve sellem, reče mu: “Koliko hoćeš.” “Četvrtinu?”, upita on. “Koliko hoćeš, a ako bude i više, bolje je za tebe”, odgovori Poslanik. “Polovinu?”, ponovo upita Ubejj. “Koliko hoćeš, a ako bude i više, bolje je za tebe”, reče Poslanik. “Dvije trećine?”, upita on.





“Koliko hoćeš, a ako bude i više, bolje je za tebe”, odgovori Poslanik. “Onda ću cijelu svoju dovu posvetiti salavatu na tebe”, reče Ubejj. Poslanik, sallallahu alejhi ve sellem, tada reče: “U tom slučaju bit ćeš riješen briga i bit će ti oprosteni grijesi.” U Musnedu imama Ahmeda navodi se da je Poslanik, sallallahu alejhi ve sellem, rekao: “U tom slučaju Allah će otkloniti tvoje dunjalučke i ahiretske brige.” Musliman nastoji spojiti dovu i blagosiljanje Poslanika, sallallahu alejhi ve sellem, jer je blagosiljanje Poslanika jedan od uzroka uslišenja dove.

Poštovani vjernici, blagosiljanje Poslanika, sallallahu alejhi ve sellem, iskupljenje je za beskoristan govor na sijelima. Sijela na kojima se ne spominje Allah i ne blagosilja Poslanik, sallallahu alejhi ve sellem, bit će uzrokom kajanja na Sudnjem danu. U Tirmizijevom Sunenu navodi se da je Vjerovjesnik, sallallahu alejhi ve sellem, rekao: “Ljudi se neće okupiti na sijelu a da na njemu ne spomenu Allaha i ne donesu salavat na svoga Vjerovjesnika, a da im to neće biti kajanje: ako hoće, oprostit će im, a ako hoće, kaznit će ih.” Ukrasite svoja sijela spominjanjem vašeg Gospodara i blagosiljanjem vašeg Vjerovjesnika, slijedite njegovu uputu, sunnet, ponašanje i vrline, postići ćete lijep život i trajni užitak na ahiretu. Uzvišeni kaže: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!” (El-Ahzab, 56)

O vjernici! Allah, džellešanuhu, je iz Svoje dobrote prema ljudima i poštovanja prema Poslaniku, sallallahu alejhi ve sellem, odredio posebne meleke koji putuju po svijetu, i prenose salavate i selame Vjerovjesniku, sallallahu alejhi ve sellem, makar to bilo s najudaljenijih mjesta. Imam Ahmed bilježi u svom Musnedu da je Poslanik, sallallahu alejhi ve sellem, rekao: “Allah ima Svoje meleke na Zemlji, koji putuju i prenose mi selame od mog ummeta.” I rekao je: “Donosite salavate na mene, vaši salavati doći će do mene gdje god da se nalazite.” (Ebu Davud) U blagoslovljenom sunnetu posebno se preporučuje donošenje salavata na Vjerovjesnika, sallallahu alejhi ve sellem, petkom. Vrijednost djela uvećava se u odabranim vremenima. Ebu Davud bilježi da je Poslanik, sallallahu alejhi ve sellem, rekao: “Najbolji dan u sedmici je petak, u njemu je stvoren Adem, i u njemu je usmrćen, i u njemu će desiti puhanje u





“KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJE
KOJU TOKOM HUTBE ELABORIRA.” (PREPOROD)

HUTBE 

sur i proživljenje. Donosite što više salavata petkom, jer se vaši salavati meni predočavaju.” Prisutni upitaše: “Allahov Poslaniče, kako će naši salavati biti tebi predočeni kada će ti tijelo istruhnuti?”, a on reče: “Allah je zemlji zabranio tijela vjerovjesnika.” Petak je najbolji dan, a Poslanik, sallallahu alejhi ve sellem, je prvak svih ljudi, tako da se preporučuje učenje što više salavata na najboljeg Vjerovjesnika u najboljem danu. On je uzrok njihovog okupljanja u namazu i spajanja njihovih srca.

Molim Allaha da podari blagoslov meni i vama u časnom Kur'anu, i da i meni i vama podari da nam koriste njegovi ajeti i mudra opomena. Rekoh ovo, i od Uzvišenog Allaha tražim oprost za sebe, za vas i sve muslimane od svakog grijeha, a tražite i vi, On mnogo prašta i milostiv je.

